

EKALESIA FA'APOTOPOTOGA KERISIANO  
I AMERIKA SAMOA

# TUSI FAILOTU 'AU LEOLEO



# 2025

“IA TATALO MA MATAALA”

## UPU TOMUA

Malo le folau, ua tautai a'e lou fa'amoemoe i lena tausaga ua mavae atu i le alofa ma le agalelei tausai mai o lo tatou Atua. E ao ai lava ona mua'i ave le fa'amua i le Atua ma vivi'i fai a'e o tatou loto i lona alofa fa'aali mai i aso uma. E le i faigofie ou faiva alofilima sa e tautua ai i lena tausaga. O se tausaga fo'i sa tele ni fa'aiuga ma filifiliga taua sa o tatou fa'afeagai o le a fausia ma atina'e ai lo ta fa'amoemoe o lenei tausaga, ma lo tatou aga atu i le lumana'i ua saunia e le Atua mo i tatou.

O le mea lea, le Ekalesia e, tatou o a'e ia i le mauga o le Atua ma ave le taulaga fa'afetai, e fa'afetaia ai lona alofa ma lona agalelei ia i tatou. Ua ia fa'aali mai le ala i le manuia, ua ia fa'ailoa foi lona fa'amaoni i lona le tu'ulafoaina o lo tatou vaivai, ina ua ia fa'aatoatoa so tatou le atoatoa, ma foa'i le malosi sa tatou maua ai le fa'amalolosi i le anoanoa'i o fa'afitauli sa o tatou fetaia'i i lena tausaga.


Ae le gata i lea, tatou te o ane fo'i ma le loto maualalo ma fa'atoese ona o lo tatou fa'atamala i la tatou mafutaga, ona ua tele taimi sa tatou le fa'amaoni ai i a tatou ta'utinoga, ma savavali i a tatou folafolaga. Sa tele foi ina mamasagia le mamalu o lo tatou Atua i lo tatou ola solomuli ma le ola pala'ai e fa'atino le mea moni e tusa ma lona finagalo, ma ua le maua ai le loto tele e fa'asoa le mea moni e fa'avae i le soifua ofoina mai o lo tatou Alii Fa'aola, ma ua tauaso ai la ta vaai i le fa'aali mai pea o lona alofa tunoa.

Ae 'aua lava ne'i galo, lo tatou tulivae i le Alii ma fa'ailoa lo tatou gaogao ma le vaivai; a aunoa ma lona fa'atasi mai, e leai so tatou malosi e fa'atino ai, ma faia ai ni fa'aiuga lototetele mo le manuia lautele o lona finagalo mo lana fanau i la tatou folauga i lenei tausaga. A o feagai pea la tatou Ekalesia ma le tele o lu'itau fou o lenei tausaga, ia manatua, ua na o Keriso lava le tali o a tatou fa'afitauli uma, ae maise ai le fa'afitauli o fualaau fa'asaina lea ua a'afia ai le soifua manuia o si o tatou atunu'u.

Avea foi lenei avanoa e momoli ai le agaga fa'afetai i le pulega a Hawaii i Sisifo, i lau susuga i le toeaina Kalasa M. Afuola ma le aufaigaluega mo le saunia lelei o lenei ta'iala e ta'ita'iina ai le soifua tatalo o lo tatou Ekalesia i lenei tausaga. Alofa le Atua ma sasa'a ana fa'amanuiaga i le tapenaina ma le fa'aogaina o lenei taiala e ta'ita'ina ai le folauga a le Ekalesia i lenei tausaga. E le galo foi le agaga fa'afetai i le susuga i le failautusi ma lona ofisa i le lolomiina o lenei fa'amoemoe taua o le Ekalesia.

Ia fa'amanuia le Atua i le folauga a la tatou Ekalesia i lenei tausaga.

Soifua,



Eleasaro Faataa FT

*Peresitene Mafutaga 'Au Leoleo EFKAS*

## TUSI FAILOTU 'AU LEOLEO MATA'UPU TALOSIA 2025

### IANUARI 04, 2025

Tusi Faitau: 2 Korinito 5:16-21

Matua: f.16- *"O lenei, e amata i nei ona po ona matou lē toe iloa se tasi i lā le tino; e ui lava ina iloa e i matou o Keriso i lā le tino, a o lenei, matou te lē toe iloa."*

MANATU AUTŪ: POTO MŌ LE ASO-FOU

#### Tatalo Fa'afetai:

- i. Ona o lona fa'a'ailoa mai o ala fou, tatou te molimauina ai lona mamalu i lo tatou vala'auina i o tatou aso.
- ii. I lona foa'iina mai o le poto ma le malamalama uma; ua fai ia ma 'au-  
pega e fa'afouina ai le ola galulue.

#### Tatalo o le Fa'ato'esega:

- i. Ona o le tauaso fa'aleagaga o i tatou tagata na ia vala'auina; ua lē mafaia ai ona iloa lelei fa'aaliga fou e faia ai lona finagalo.
- ii. Ona o lo tatou taumafai ina ia olaina pea le Tala Lelei o le olataga i ala tuai, ma i'u ina lē talafeagai ai le tala'iga ma le taimi.

#### Tatalo o Mana'oga:

- i. Ina ia liliuina le tagata tuai e fai ma tagata fou i lenei tausaga; e fai ai i tatou ma mea faigaluega ua fa'afouina i lā le agaga.
- ii. Ia fa'atumauina fo'i e le Atua le fou o le ola iā Keriso Iesū, e 'oli'oli ai ile leleiga na ia faia mo i tatou uma.

### IANUARI 11, 2025

Tusi Faitau: Esoto 17:8-13

Matua: f.12- *"Ua mamafa lima o Mose, ona lā ave lea o le ma'a, ma tu'u ai i ona lalo, ona ti'eti'e ai lea o ia; a'o Arona ma Huro ua lā taofi i luga ona lima, o le tasi i lea itū, ma le tasi i lea itū; ua mau ai ona lima ina se'ia goto le lā."*

MANATU AUTŪ: TAUSOA FA'ATASI SE'IA O'O I LE I'UGA

#### Tatalo Fa'afetai:

- i. Ia fa'afetaia le Atua i lona finagalo-alofa, ua vala'auina fa'atasi ai i tatou uma mo ana galuega.
- ii. Fa'afetai i le Atua i lona malamalama lautele ua soluia ai o tatou loto, ua faigofie ai ona tatou amoina fa'atasi le mamafa o lo tatou vala'auina.

#### Tatalo o le Fa'ato'esega:

- i. Ina ua pūlea pea i tatou i le manatu fa'apito; ua leai ai se fa'amalolosi e faia ai le Galuega a Keriso ile mafaufau ma le loto e tasi.
- ii. Ona ua tele fo'i ina tatou fa'alagolago i lo tatou lava mālosi, ua āfaina ai le maopoopoga o le Ekalesia a Iesū i o tatou lima.

#### Tatalo o Mana'oga:

- i. Ia foa'iina mai e le Atua le fa'atuatua maua'a, e fa'alagolago ai ma le mautinoa ia te ia, ma atia'e ai lana Ekalesia i le lotogatasitasi.
- ii. Ia fa'aaogaina lava i tatou uma, e ala mai ai galuega a le Agaga, ina ia faia ai pea lona finagalo i lo tatou ola.

### **IANUARI 18, 2025**

Tusi Faitau: Galuega 16:1-5

Matua: f.3- *"Ua mana'o Paulo la te o ma ia, ona ia peritomeina lea ia te ia, ona o tagata lutaia oi ia nu'u; auā ua iloa e i latou uma lava o le Eleni lona tamā."*

MANATU AUTŪ: OFOINA ATU ATOA

#### **Tatalo Fa'afetai:**

- i. Ia fa'afetaia le Atua i lana vala'au lautele mo i tatou uma, ua leai ai se pavaeloto e taofia ai le ofoina atu o tatou ola mo ia.
- ii. Ia fa'afetaia le Atua i lona tatalaina mai o faitoto'a, o lo'o punitia ai le ulufale mai o lana fanau uma e 'au'auna atu ia te ia ma le loto 'atoa.

#### **Tatalo o le Fa'ato'esega:**

- i. E fa'ato'ese ona le pumo'omo'o o le va'ai ile finagalo alofa o le Atua mo tagata uma.
- ii. E fa'ato'ese ona ua faigatā lo tatou taliaina o galuega lelei o lo'o faia e isi tagata mo le Ali'i, ina ua tatou fa'atagata-'eseina i latou.

#### **Tatalo o Mana'oga:**

- i. Ia fa'asoaina mai pea e lo tatou Atua le potō e iloa ma talia ai e i tatou lona finagalo lautele mō tagata uma.
- ii. Ia na fusia fa'atasi le lalolagi-fa'atuatua uma, i le molimauina o lana fa'aolataga ia Keriso Iesu lo tatou Ali'i.

### **IANUARI 25, 2025**

Tusi Faitau: Fa'ata'oto 17:1-5

Matua: f.1- *"E lelei si fasi mea e 'ai ua magumagu, a'o iai le filemu; 'ae leaga le fale ua tumu i manu ua fasia, a'o iai le misa."*

MANATU AUTŪ: PUNA MAI LE LOTO

#### **Tatalo Fa'afetai:**

- i. Ia fa'afetaia le Atua o lo'o afio i le loto o le tagata ua fa'atuatua fa'a-maoni ia te ia, ua mafaia ai ona fiafia i mea ua maua.
- ii. Ia fa'afetaia fo'i le Atua i lona sa'ilia pea o loto uma, ma ia iloiloina ma fa'amalosia e fai ai ma lotomau ia te ia.

#### **Tatalo o le Fa'ato'esega:**

- i. E fa'ato'ese i le Atua ona ua to'ilalo o tatou loto i ona luma, e ala ile faia o mea tatou te manana'o iai, ae lafoa'i lona finagalo pa'ia.
- ii. E fa'ato'ese fo'i i le Atua ona o le limata'ita'iina pea o o tatou loto e le losilosivale, ua tupu ai le malaia.

### Tatalo o Mana'oga:

- i. Ia foa'iina mai mō i tatou ni loto e fa'atuatua moni iā te ia; ia tupu ai le fa'amalieina ma le loto fa'afetai i mea ua foa'iina mai.
- ii. Ia avea o tatou loto ma nofoaga e afio ai o ia i aso uma, ina ua liliuina e le salamō mai le leaga o tu'inanauga o le ola nei.

### **FEPUARI 01, 2025**

Tusi Faitau: 1 Peteru 1:22-25

Matua: f.23- *“ua fanaufouina outou e lē o le fua e pala, a'o le fua e lē pala lava, o le afioga a le Atua lea ua ola ma ua tūmau e o'o i le fa'avavau.”*

MANATU AUTU: IA FUA MAI PEA

### Tatalo Fa'afetai:

- i. Ia fa'afetaia le Atua, ona o lona finagalo alofa, na totōina ai le fatu, ma ua tupu a'e ai ma fua tele mai.
- ii. Ia fa'afetaia fo'i le Atua o manuia, ina ua na fa'atūmauina le fuata mai o le fatu na ia totōina, i le fesoasoani mai o lona Agaga.

### Tatalo o le Fa'ato'esega:

- i. E fa'ato'ese ile Atua ina ua vaivai pea la tatou faitau ma su'esu'e i lona finagalo, ua tupu ai le tauaso i o tatou loto.
- ii. E fa'ato'ese ile Atua ona ua fa'atamala pea i tatou ile tala'iina atu o lona finagalo, ma i'u ai ina itiiti fua ua maua o le seleselega.

### Tatalo o Mana'oga:

- i. Ia fa'asa'olotoina i tatou e lona Agaga Pa'ia mai saisaitiaga leaga, ia fua mai ai galuega o lo'o tatou faia i fua lelei ua ia finagalo iai.
- ii. Ia fa'amalasia lo tatou vaivai, ina ia avea ai lana Ekalesia ma 'eleele lelei, e tupu a'e ai le saito e fua pea, ma fua tele mai.

### **FEPUARI 08, 2025**

Tusi Faitau: Isaia 52:1-3

Matua: f.1&2- *“Ala ma ia, inā ala mai; Ia ē lūlū 'oe iā te 'oe 'ai le efuefu.”*

MANATU AUTŪ: FAAFOUINA MŌ LE OLA FOU

### Tatalo Fa'afetai:

- i. Ia fa'afetaia le Atua ua na vala'auina i tatou mō ona manuia, ua ia saunia fo'i lo tatou ola mō ia manuia.
- ii. Ia fa'afetaia fo'i le Atua e ou le sa'olotoga, ua ia tatalaina mai ai fo'i le faitoto'a tatou te ulufale atu ai.

### Tatalo o le Fa'ato'esega:

- i. Ona o i tatou lava o le fanau o lo'o nonofo ile efuefu o le agasala, ma ua faigatā lava ona tatou ō 'ese ai.
- ii. Ona o le fa'alumaina pea o lona suafa i lo tatou tafefea 'ese so'o mai lona mamalu.

Tatalo o Mana’oga:

- i. Ina ia alofa mai i lo tatou ola saisaitia i aso uma, ma tatala mai noataga u’amea o le agasala o lo’o saisaitia ai i tatou.
- ii. Ina ia tafi ‘esea e lona Mana le efuefu ma le ‘ele’elea o i tatou uma; ma ia toe fanaufouina i tatou i le maliu o Iesū Keriso lo tatou Ali’i manu-mālō.

**FEPUARI 15, 2025**

Tusi Faitau: Mataio 26:26-30

Matua: f.28- *“auā o lo’u toto lenei, o le toto o le feagaiga fou, ua fa’amaligiina mō tagata e to’atele e fa’amagalo a’i agasala.”*

MANATU AUTŪ: FEAGAIGA O LE OLA FOU

Tatalo Fa’afetai:

- i. Ona o le alofa tele o lo tatou Ali’i, ua fa’amaligiina ai lona lava toto, e fai ma Feagaiga fou e ole ai tagata uma.
- ii. Ona o lona toto na fa’amaligiina mō agasala a le lalolagi uma, ua avea lea ma sa’olotoga moni o le ola fou iā Keriso.

Tatalo o le Fa’ato’eseaga:

- i. Ona ua tatou feinu pea ma loto lē mautinoa i le toto o lo tatou Ali’i, na fa’amaligiina mo fa’amagaloina o agasala.
- ii. Ina ua vaivai pea i tatou, e molimau atu le Feagaiga fou ua faia e Keriso mo lo tatou lavea’iina.

Tatalo o Mana’oga:

- i. Ina ia foa’iina mai mo i tatou le Agaga Pa’ia, na te fānaufouina lo tatou ola ile feagaiga ua faia e Keriso mo i tatou.
- ii. Ina ia foa’iina mai mo i tatou le agaga fa’afetai, ona o le feagaiga fou ua tatou ola uma ai.

**FEPUARI 22, 2025**

Tusi Faitau: Opetai 9:11-15

Matua: f.15- *“Oute totōina i latou i lo latou lau’ele’ele; e lē toe lia’iina i latou ai lo latou lau’ele’ele na ‘ou faoa’iina atu ai iā te i latou, o lo’o fetalai mai ai le ali’i lou Atua.”*

MANATU AUTŪ: MANUIA TŪMAU

Tatalo o le Fa’afetai:

- i. Ona o le liuliualo mai o ona fofoga alofa i ē ua malaia, ma foa’iina mai ai le manuia e lē mavae ina ia ola fiafia ai.
- ii. Ina ua ia toe fa’afō’isia le mamalu o lona suafa, e molimauaina ai le silisili ‘ese o lana pule e i latou ua ia fa’amagaloina.

Tatalo o le Fa’ato’eseaga:

- i. Ona o le olaga to’ilalo o i tatou lana fanau na ia filifilia, ua fai lea ma pogai o le fa’atafunaina o mea na ia foa’iina mai.

- ii. Ina ua faia pea o tatou loto, ae lafoa'i le finagalo pa'ia o le Atua na vala-auina i tatou i lona alofa fua mai.

Tatalo o Mana'oga:

- i. Ia u'umauina pea i tatou i ona a'ao agalelei, e fa'atūmauina ai le ola ma le fiafia e lē mavae.
- ii. Ia faia pea lana pule amiotonu e tusa ma lona alofa fa'amagalo i ē ua tauau ina pa'u'ū atu i le leaga.

**MATI 01, 2025**

Tusi Faitau: Tito 3:12-15

Matua: f.14- *"Ia a'oa'o'ina fo'i o tatou uso, ina ia faia e i latou galuega lelei aogā mo tagata uma.*

MANATU AUTŪ: LE OLA IA AOGĀ

Tatalo o le Fa'afetai:

- i. Ona o le vala'auina pea o i tatou mō ana galuega, e foa'iina mai ai atili ana mea alofa, e ta'uaogaina ai lo tatou ola.
- ii. Ona o lona a'oa'o'ina pea fo'i o i tatou i ala tonu e fa'aaogaina ai ia mea alofa ua foa'iina mai.

Tatalo o le Fa'ato'esega:

- i. Ina ua tatou faia pea ana galuega mō o tatou lava vi'iga; ma punitia ai le iloa atu e isi tagata le mamalu o le Atua.
- ii. Ona ua tatou tu'u le lelei mo i tatou, ae fa'atuana'i le ofoina atu o mea sili mō le galuega na vala'auina ai i tatou.

Tatalo o Mana'oga:

- i. Ina ia foa'iina mai pea avanoa, e fa'aleleia atili ai lo tatou olaga 'auauna iā te ia.
- ii. Ina ia fesoasoani mai lava lona Agaga Pa'ia, e tauto'alua i tatou i aso o lu'itau mamafa o le soifuaga nei.

**MATI 08, 2025**

Tusi Faitau: Iopu 42:1-6

Matua: f.5&6- *"Sa ou fa'alogo iā te oe i le fa'alogo o o'u taliga; a'o lenei, ua va'ai atu o'u matai iā te oe; o le mea lea ua ou ino'ino ai iā te a'u, ua ou salamō fo'i i le efuefu ma le lefulefu."*

MANATU AUTŪ: A'OA'OINA I LE SALAMŌ

Tatalo Fa'afetai:

- i. Ona o le fa'amaoni o lona alofa ile tagata vaivai ma le fa'atauva'a, ua na lē tauia mai ai e tusa ma le valea.
- ii. Ona o lona tatalaina mai o le faitoto'a, e iloa atu ai lona alofa silisili 'ese, ma lavea'iina ai i tatou.

Tatalo o le Fa'ato'esega:

- i. Ona o lo tatou fa'amauualuluga i le potu ma le malosi ua maua, a ua pogisa ai le va'ai ile mata'utia o le Atua o lo'o fetalai mai.
- ii. Ona ua lē maua le fa'atuatua, e iloa tino ai le Atua ma lona finagalo moni, mo i tatou tagata na ia faia.

**Tatalo o Mana'oga:**

- i. Ina ia foa'iina mai pea le fa'alogu ma le va'ai o lo'o tatou mana'o-mia, mō lo tatou lavea'iina mai iā i tatou lava.
- ii. Ia avea le 'salamō' ua foa'i mai e fai ma meatonu i le olaga, ina ia tupu atili ai le iloa lelei, o le pule amiotonu a lē na faia i tatou.

**MATI 15, 2025**

Tusi Faitau: Ioane 10:14-18

Matua: f.16- *"Ua iā te a'u fo'i isi māmoe e lē o i lenei lotoā; e tatau ona 'ou ta'ita'iina mai o i latou fo'i, e fa'alogu fo'i i latou i lo'u leo; ona tasi ai lea o le lafu māmoe, ma le leo leo māmoe e to'atasi."*

MANATU AUTŪ: TASI LE LEOLEO MĀMOE, TASI LE LAFU MĀMOE

**Tatalo Fa'afetai:**

- i. Ona o le fa'atauaofia fa'atasi o ona tagata uma i lalo o lana leoleoga, ua iloa ai le atoaga o lona alofa lē fa'atuā'oia.
- ii. Ona ua faia lava lana puleamiotonu mai lona Tamā; ua lavea'iina ai le lafu māmoe ua fa'ata'ape'apeina.

**Tatalo o le Fa'ato'esega:**

- i. Ina ua pumo'omo'o la tatou va'ai i isi māmoe o lo'o i fafo atu o le lotoā; ma ua leai fo'i se galuega lavea'i o faia mo i latou.
- ii. Ina ua pupū o tatou loto i o tatou lava lotoifale, ae fa'atuana'i ai le silasila fa'a-Keriso i lana lafu māmoe atoa e tasi.

**Tatalo o Mana'oga:**

- i. Ia silasila mai pea fofoga alofa o lo tatou Leo leo Māmoe Lelei, ma avatu i tatou i totonu o lana leoleoga malu.
- ii. Ia foa'iina mai le mautinoa i o tatou loto; e ui ai ina ta'asē solo o tatou loto; a'o i tatou lava o māmoe o lana lafu.

**MATI 22, 2025**

Tusi Faitau: Kenese 8:18-22

Matua: f.20-21- *"Ona faia lea e Noa o le fata faitaulaga i le Ali'i; ua avea fo'i e ia nisi manu i manu vaefā uma e mamā, ma manu felelele uma e mamā, ua ia fai a'i taulaga mū i le fata. Ua lagona foi e le Ali'i le manogi lelei, ona fa'apea ifo lea o le Ali'i i lona finagalo, e ui lava ina leaga o manatu o loto o tagata e āfua mai ina o tamaiti, 'ou te lē toe fa'ao'o le malaia i le lau'ele'ele ona o tagata; 'ou te lē toe taia mea ola uma e pei ona ou faia."*

MANATU AUTU: TAULAGA FA'AFETAI

**Tatalo Fa'afetai:**



- i. Ona o le lavea'iina o le ola ua ia faia lava; ua fai fo'i lea ma pogai o le agaga vivi'i.
- ii. Ona o le agaga ua ia foa'iina mai e ofoina atu ai taulaga mū; e fai lea ma molimau i lona alofa ua faula'i mo ona tagata uma.

**Tatalo o le Fa'ato'esega:**

- i. Ona o le ola faitaulaga, ua faia pea ma le loto māsalosalo i le Atua ma lona alofa tele mai.
- ii. Ona o le ola faitaulaga ua fa'atagāfai i le Atua, ma ua tatou lē maua ai fa'alumaga e tatau mo i tatou.

**Tatalo o Mana'oga:**

- i. Ia fa'atūmauina pea lona alofa mo i tatou lana fanau, e ofoina atu ai taulaga e tatau ma lona mamalu.
- ii. Ia foa'iina mai pea le agaga moni e faia ai taulaga sili mo ia, e pei ona faia e Keriso mo le lalolagi uma.

**MATI 29, 2025**

Tusi Faitau: Fa'aaliga 2:8-11

Matua: f.10- *"Ia ē fa'amaoni se'ia o'o i le oti, ona ou avatu ai lea iā te 'oe o le pale o le ola."*

MANATU AUTŪ: PALE FA'AVAVAU

**Tatalo Fa'afetai:**

- i. Ona o lona fa'amaoni ua foa'iina mai mo i tatou, e fa'atupuina ai le iloa i o tatou loto, o le tāua o taunu'uga manuia.
- ii. Ona o lona fa'avavau ua folafolaina mai, ile tau e tele mō le tagata ua ola fa'amaoni.

**Tatalo o le Fa'ato'esega:**

- i. Ona o le lē fa'amaoni o lo tatou ola ile tele o aso, ua ta'ita'iina 'ese ai i tatou mai manuia o le lagi.
- ii. Ona o le leai o se fa'atuatua moni i le Keriso; o lē na fa'aalia mai i lona soifua pa'ia, o le atoa o lona fa'amaoni ma lona tau.

**Tatalo o Mana'oga:**

- i. Ia foa'iina mai mo i tatou le lotomau, e onosa'i ai i faigatā o le ola 'au-auna iā te ia.
- ii. Ia liligi tele mai lona Agaga Pa'ia i luga o lana Ekalesia, e fai ai i tatou ma molimau-ola i le Keriso manumālō.

**APERILA 05, 2025**

Tusi Faitau: Sakaria 8:1-6

Matua: f.6- *"O lo'o fa'apea ona fetalai mai o le Ali'i o 'au, E ui lava ina faigatā i le manatu o ē ua totoe o lenei nu'u i ia ona aso, pe faigatā 'ea fo'i i lo'u manatu? Ua fetalai mai ai le Ali'i o 'au?"*

MANATU AUTŪ: FAIGOFIE I LE ALI'I

### Tatalo Fa'afetai:

- i. Ia fa'afetaia lava le Atua Silisili Ese, ona o lona fa'amāmā-avega mai i aso leaga o lo tatou ola.
- ii. Ia fa'afetaia fo'i le Atua o le malosi uma lava, ile galuega a lona Agaga Pa'ia, ua na fa'ailoa mai le filemu: moni i taimi e lē taugalēmū ai le ola.

### Tatalo o le Fa'ato'esega:

- i. Ona o le fa'atuatua itiiti ma le ola taumatemate, o lo'o fa'avaivaia ai pea le ola galue mo le Ali'i.
- ii. Ona o le fa'alologologo tīgā, o lo'o lapelapea ai le aga'i i luma o le soifua tautua ile Atua.

### Tatalo o Mana'oga:

- i. Ina ia faia pea e lona Agaga vāvega i lo tatou ola, e ui lava i lo tatou loto vaivai ma le fefefevale i lu'itau tatou te fetaia'i.
- ii. Ia foa'iina mai lava mo i tatou le fa'amaoni e alolofa ai iā te ia ma le loto atoa; ia aliali ai lona mamalu i mea tatou te faia.

## **APERILA 12, 2025**

Tusi Faitau: Luka 22:7-13

Matua: f.13- *"Ona lā ō ai lea, ua iloa ai pei ona fetalai atu o ia iā te i lā'ua; ona lā saunia ai lea o le pāseka."*

MANATU AUTŪ: INĀ Ō ATU IA

### Tatalo o le Fa'afetai:

- i. Ia fa'afetaia le Atua mata'utia i lana pule, ua āfua ai lo tatou vala'auina e fai ma so'o o lo tatou Ali'i.
- ii. Ia fa'afetaia fo'i le Atua mamalu, ona o le lima ta'ita'iina pea o i tatou i ala tonu e faia ai lona finagalo.

### Tatalo o le Fa'ato'esega:

- i. Ona o le nenefu o la tatou va'ai, ma le tutuli o le fa'alogo atu i lona fetalai mai, e fa'atonu lo tatou ō atu.
- ii. Ina ua tatou tu'ua le ala ua fa'asino mai, ae faia pea lo tatou poto, ma i'u ai ina tatou paiē e tutū i luga ma galulue.

### Tatalo o Mana'oga:

- i. A o aga atu le Ali'i i le satauro; ia avea lea ma fafagu mo i tatou, e saunia ai i tatou e fai ma molimau fa'amaoni o ona puapuaga.
- ii. Ina ia fesoasoani mai lona Agaga Pa'ia, ma na ta'ita'ina atu la tatou fa'alogo ma le va'ai, ile Ali'i o lo'o fa'aali mai.

## **APERILA 19, 2025**

Tusi Faitau: Mataio 27:55-61

Matua: f.59&60- *"Ua ave e Iosefa le tino, ona 'aui ai lea i le 'ie lino e mamā. Ua tu'u ai i lona tu'ugamau fou na foa i le papa; ua fuli atu e ia le ma'a tele i le gutu o le tu'ugamau, ona alu ai lea o ia."*

## MANATU AUTŪ: O LE TU'UGAMAU FOU

### Tatalo Fa'afetai:

- i. Ia fa'afetaia le Atua mamalu, ona o lona saunia lelei o tagata aogā mō lana fa'aolataga, ina ia aliali ai le pa'ia o lona finagalo.
- ii. Ia fa'afetaia le Atua ona o le si'omaga mafatia, a ua ia tapenaina mai ai le matagofie ma le mata'utia o lo tatou lavea'iina.

### Tatalo o le Fa'ato'esega:

- i. Ona ua tatou lē mafai ona 'auai i lā le fa'atuatua, ile tualugaina o galu-ega lelei ua vala'auina ai i tatou, ona o le fa'avaivai.
- ii. Ina ua tatou lē mafai fo'i ona ofoina atu le alofa sili mo lo tatou Atua, i taimi e osofia ai i tatou e le fa'alotolotua.

### Tatalo o Mana'oga:

- i. Ia fa'aaogaina pea i tatou e le Atua, i aso e sosola 'ese ai isi tagata, ma ia tatou faia ai pea mea sili mo ia.
- ii. Ia foa'iina mai le mālosi ato'atoa i o tatou loto, e fa'apaleina ai lo tatou Atua i ala e molimauiina ai lona pa'ia silisili 'ese.

## **APERILA 26, 2025**

Tusi Faitau: Salamo 119:169-176

Matua: ff.174&175- *"Le Ali'i e, 'ou te naunau i lau fa'aolataga; o lau tulafono fo'i, o lo'u lea fiafia. Ia ola lava a'u, ina ia ou vivi'i atu iā te 'oe; ia fesoasoani mai fo'i au fa'amasinoga iā te a'u."*

MANATU AUTŪ: PESE FIAFIA ILE AL'I

### Tatalo Fa'afetai:

- i. Ia fa'afetaia lo tatou Atua, ona o le fiafia; ua totōina i o tatou loto, ua ofoina atu ai vi'iga e faia mai le loto 'atoa.
- ii. Ia fa'afetaia fo'i le Atua ile tausa'afia o lona alofa ua fa'aalia mai ai mo i tatou lana fa'aolataga.

### Tatalo o le Fa'ato'esega:

- i. Ona o le vaivai e su'esu'e i ana afioaga; ua lē 'atoa ai le vi'iga e tatau ona ofoina atu i le Atua.
- ii. Ona o le fa'ata'eta'ealuga o ala e fa'aalia ai le fiafia i luma o le Atua, ma le ofoina atu lo tatou ola mo ia.

### Tatalo o Mana'oga:

- i. Ia foa'iina mai le agaga-fiafia moni, e sa'afi fiafia ai le ola e vivi'i i ala uma ua ia fa'asino mai.
- ii. Ia logo lelei i lana fa'afofoga vi'iga ma fa'ane'etaga e faia, ina ua fa'a-malieina o tatou loto i lona alofa tele mai.

## **ME 03, 2025**

Tusi Faitau: 1 Timoteo 2:1-7

Matua: f.5- *“Auā e to’atasi le Atua, e to’atasi fo’i le puluvaga i le Atua ma tagata, o le tagata o Keriso Iesū.”*

MANATU AUTŪ: PULUVAGA E OLA AI

Tatalo Fa’afetai:

- i. Ia fa’afetaia le Atua, ina ua fa’aalia mai le tasi o lana pule aoao, e tasi fo’i lona Alo na liu tagata e osi ai le taulaga mō agasala.
- ii. Ia fa’afetaia le Atua ona o le mamana o ana fuafuaga, ua filifilia ai Keriso na te galuea’iina le leleiga i lo tatou va ma ia.

Tatalo o le Fa’ato’esega:

- i. Auā ua tatou lē ana’ana ile galuega fa’aola a Keriso na faia to’atasi, ma atili ai ona tatou vaivai i o tatou vala’auina.
- ii. Ona ua lē atagia le galuega o le leleiga na faia e Iesū mo i tatou, ua atili ai ona fenumia’i tagata ua tatou tala’iina iai le Tala Lelei.

Tatalo o Mana’oga:

- i. Ina ia fa’amalosia i tatou e lona Agaga, ile faia o ōlega ma talotaloga, o fa’atoga fo’i ma fa’afetai mō tagata uma lava.
- ii. Ia fa’aaogaina lava i tatou e fai ma puluvaga, e fa’atupuina le filemu i totonu o aiga ma nu’u, ae maise lana Ekalesia.

**ME 10. 2025**

Tusi Faitau: 2 Samuelu 1:21-28

Matua: ff.27&28- *“o le tama nei na ou tatalo atu ai; ua foa’i mai e le Ali’i iā te a’u le mea na ou fa’atoga atu ai iā te ia. O a’u fo’i ua ‘ou tu’uina atu o ia i le Ali’i; ua tu’uina atu o ia i le Ali’i i aso uma e ola ai o ia; ona ifo ai lea o ia i le Ali’i i lea mea.”*

MANATU AUTŪ: TAULAGA TAGATA

Tatalo Fa’afetai:

- i. Ia fa’afetaia le Atua alofa, ona o lana foa’I tagata; ua fai lea ma fa’aaliga maualuga o lona amana’iaina o i tatou.
- ii. Ia fa’afetaia le Atua agalelei, ua ia foa’iina mai fo’i le lototele, e faia ai taulaga sili mo ia.

Tatalo o le Fa’ato’esega:

- i. Ona o le fa’atuatua fa’ata’eta’ealuga o lo’o tatou o ola ai pea, ua vaivai ai le ofoina atu o taulaga sili mo le Ali’i.
- ii. Ona o tautoga pepelo ua tatou faia i ona luma, ua aliali ai le vaivai o lo tatou alolofa moni iā te ia.

Tatalo o Mana’oga:

- i. Ina ia maua pea ni tinā e pei o Hana ma lana tatalo, na aliali ai lona fa’amaoni i luma o le Atua mamalu.
- ii. Ina ia a’oa’o mai pea i tatou e lona Agaga Pa’ia, i le loloto o lona finagalo alofa i ē ua fa’atuatua moni iā te ia.

## **ME 17, 2025**

Tusi Faitau: Luka 6:43-45

Matua: f.43- *“E leai foi se la’au lelei e fua mai i fua leaga; e leai foi se la’au leaga e fua mai i fua lelei.”*

MANATU AUTŪ: SU’ESU’E IFO I LOU LOTO

### **Tatalo Fa’afetai:**

- i. Ona o Iesu Keriso o le fua lelei o le fa’amoemoe o Kerisiano uma.
- ii. Ona o Iesu Keriso ua fa’amanatu mai tu ma aga a matua e tatau ai mo le tausia o fanau ma aiga.

### **Tatalo o le Fa’ato’eseaga:**

- i. Ona o tatou tagata Kerisiano i le tele o taimi ua fua mai fua leaga i mea e faia.
- ii. Ona o le Ekalesia ua le fesili i le Atua i ala e fa’atino ai tiute o se laau lelei e fuaina le loto ma mea lelei mo le atunuu.

### **Tatalo o Mana’oga:**

- i. Ina ia fa’amalosia le fa’atuatua o tatou tagata Kerisiano i le Atua, o le laau lelei e tupu mai ai amio Lelei.
- ii. Ina ia galue le Ekalesia e fafaga agaga o le atunuu i fua lelei ua aoaoina e Iesu Keriso, ia le gata i le loto a’o amio ia taulai i le Atua.

## **ME 24, 2025**

Tusi Faitau: Malaki 4:1-3

Matua: f.2- *“A’o outou o ē matata’u i lo’u igoa, e alu a’e iā te outou le Lā o le amiotonu; e iai fo’i le mea e mālōlō ai i ona apa’au; e ō atu fo’i outou ma osooso, pei o tama’i povi mai le fale povi.”*

MANATU AUTŪ: PAOLO O ONA APA’AU

### **Tatalo Fa’afetai:**

- i. Ia fa’afetaia le Atua matagofie, ona o lona alofa ua suluia ai o tatou loto i lona malamalama moni.
- ii. Ia fa’afetaia fo’i le Atua maualuga, ina ua na ta’ita’iina atu lava i tatou ile mapusaga filemu o lo’o ile paolo o ona apa’au.

### **Tatalo o le Fa’ato’eseaga:**

- i. Ona o lo tatou ola fa’amaualuluga i isi o tatou uso ā tagata, ua o’o mai ai le malaia iā i tatou.
- ii. Ona o le amio leaga uma o lo’o faia pea, ua pogisā ai isi tagata ona o i tatou.

### **Tatalo o Mana’oga:**

- i. Ina ia fa’atupuina i o tatou loto le filemu moni, e susulu atu ai le malamalama o Keriso ile lalolagi uma.
- ii. Ia totōina lava le ‘oli’oli e lē aunoa i o tatou loto e lona lava Agaga Pa’ia, e faia ai le amiotonu ma usita’i ai iā te ia.

## **Me 31, 2025**

Tusi Faitau: Luka 24:50-53

Matua: f.51- *“Ua o’o ina o fa’amanuia e ia iā te i latou, ona te’a ‘ese lea o ia iā te i latou, ua si’itia i le lagi.”*

MANATU AUTŪ: MANUIA O LE AFIO-A’E

### **Tatalo o le Fa’afetai:**

- i. Ona o le manuia ua tu’uina mai e ala i le afio a’e o lo tatou Ali’i
- ii. Ona o lona mamalu ua fa’aalia i le galuega ua mǎe’a ona tapenaina mo i tatou, ma ua fa’amamaluina ai lana Ekalesia.

### **Tatalo o le Fa’ato’esega:**

- i. Ona o le manuia ua valetulima mai iā i tatou tagata lē fa’amaoni i faiva ua vala’auina ai.
- ii. Ina ua leai se mamalu o le Keriso Afio-a’e e aliali i lo tatou ola molimau.

### **Tatalo o Mana’oga:**

- i. Ia faia lava i tatou ma ‘auauna loto maulalo, e molimau i le mamalu o le Ali’i ma lona manumālō.
- ii. Ia tu’uina mai mo i tatou le loto fiafia, e ofoina atu ai le vi’iga ma le mamalu i lo tatou Ali’i ua afio a’e.

## **IUNI 07, 2025**

Tusi Faitau: Numera 11:24-30

Matua: f. 29- *“Ona fai atu ai lea o Mose iā te ia, ua ē matau’a ‘ea ona o a’u? Oute mana’o lava ia fai ma perofeta le nu’u uma o le Ali’i, ma ia foa’iina atu e le Ali’i lona Agaga iā te i latou.”*

MANATU AUTŪ: AGAGA FAITELE

### **Tatalo Fa’afetai:**

- i. Ona o le avanoa mo tagata uma, ua faia iai le pule a lona Agaga Pa’ia, ma aveva ai tagata uma ma molimau o lona mamalu.
- ii. Ona o lona a’oa’o mai pea i le leaga o le manatu fa’apito.

### **Tatalo o le Fa’ato’esega:**

- i. Ona o le punitia pea o la tatou va’ai i le lautele o lona alofa, o lo’o fa’aalia mai lava e lona Agaga Pa’ia i aso uma.
- ii. Ona ua fai pea i tatou ma fa’amasino i ala ua fa’aaogaina ai lo tatou ola.

### **Tatalo o Mana’oga:**

- i. Ina ia foa’iina mai pea e le Atua lona Agaga mo i tatou uma, ina ia tatou molimau fa’atasi ai i le silisili ‘ese o lona mana.
- ii. Ia fusia fa’atasi tagata uma i fa’aaliga a le Agaga, e tutupu fa’atasi a’e ai i lā le fa’atuatua.

## **IUNI 14, 2025**

Tusi Faitau: Kolose 2:8-15

Matua: f.9- *“Auā o lo’o mau i totonu iā te ia le tumu uma lava o le uiga Atua ua i lona tino; o lo’o ua fa’a’ato’atoaina fo’i outou iā te ia; o le ulu ia o ali’i sili uma lava atoa ma faipule.”*

MANATU AUTŪ: TUMU ATOA O LE ATUA

Tatalo Fa’afetai:

- i. Ona o le fa’aaliga ua atoa i ai lona mamalu, e ala iā Keriso Iesū lo tatou Fa’aola.
- ii. Ona o lana pule ato’atoa ua fa’aalia manino mai i le lavea’iina o i tatou uma mai le agasala.

Tatalo o le Fa’ato’eseaga:

- i. Ina ua lē mafai ona tatou iloa le atoaga o le Atua ua fa’aali mai, ina ua itiiti pea le fa’atuatua i o tatou loto.
- ii. Auā ua lē mafai fo’i ona tatou fa’atinoina lo tatou vala’auina i le ato atoa, na fa’aalia i le galuega a Keriso.

Tatalo o Mana’oga:

- i. Ia foa’iina mai mo i tatou uma le mālosi fa’ale-agaga, e faitaulaga ai i lo tatou Atua i le agaga ua atoatoa.
- ii. Ia avea i tatou uma ma molimau i le tumu atoa o le Atua i ana galuega mamana, o lo’o faia pea mo i tatou uma.

**IUNI 21, 2025**

Tusi Faitau: Esekielu 30:12-17

Matua: f.f15a&17a- *“Pe se ā le mea ua ē alaga mai ai ona o lou manu’a? Auā, ‘oute fa’amālōlōina ‘oe, ‘oute fofōina ou manu’a, o lo’o fetalai mai ai le ALII.”*

MANATU AUTŪ: FOMA’I SILI

Tatalo Fa’afetai:

- i. Ona o lona alofa fa’amagalalo ua toe fofōina ai manu’a o i tatou le nu’u agasala.
- ii. Ona o lana pule ua toe fa’afouina ai le mālosi o le tagata na fai a fano.

Tatalo o le Fa’ato’eseaga:

- i. Ona o le agasala ua ogaoga ma ua mamafa na’uā, ua pogai ai le fa’aalia mai o le to’asā o le Atua amiotonu.
- ii. Ona ua leai se loto salamō moni e fo’i ai ile Atua; ma i’u atu i se tauma-faiga e fa’afouina o tatou tagata tuai.

Tatalo o Mana’oga:

- i. Ia faia pea e lo tatou Atua lana galuega fa’amālōlō, e maua ai mapusaga o le filemu moni mo i tatou o tagata agasala.
- ii. Ia foa’iina mai fo’i e lo tatou Atua le loto-salamō moni, e liliu ‘ese ai i ala o le malaia, ma filifili tonu i ala e ola ai.

**IUNI 28, 2025**

Tusi Faitau: Roma 3:27-31

Matua: f.30- *“Auā fo’i o le Atua e tasi lava ia; na te ta’uamiotonuina fo’i i le fa’atuatua lē ua peritomeina atoa ma lē ua lē peritomeina..”*

MANATU AUTŪ: OLA I LE FA’ATUATUA

Tatalo Fa’afetai:

- i. Ia fa’afetaia lo tatou Atua Mamalu, o lē e ou le fa’atuatua ua atoatoa; o lana mea alofa lea mo i tatou e ola fiafia ai.
- ii. Ia fa’afetaia fo’i le Atua e ou le Mana uma lava, na te liliuina le fa’atuatua itiiti e faia ai vāvega tetele i lo tatou ola.

Tatalo o le Fa’ato’esega:

- i. Ona o lo tatou vaivai pea e ala i le fa’atuatua galue, a ua tele pea i le fa’atuatua nofononofo.
- ii. Ua lalafi pea i tatou i upu logolelei i le fa’alogo, ae leai ni galuega aogā o tatou faia mō isi tagata.

Tatalo o Mana’oga:

- i. Ina ia liuliuilo mai fofoga alofa o lo tatou Atua e to’atasi, e toe fausia i tatou o ni mea faigaluega moni o le fa’atuatua.
- ii. Ia foa’iina mai lona Agaga, e fa’amausali ai pea lo tatou ola fa’atuatua, e iloa ai le tāua o le savali i ala o le amiotonu.

**Iulai 05, 2025**

Tusi Faitau- Roma 8:31-39

Matua f.37- *A ua tatou manumalo aiai i nei mea uma lava, ona o la ua alofa mai ia te’i tatou.*

MANATU AUTŪ: O LE ATUA ALOFA

Tatalo Fa’afetai:

- i. Ona o le silisili ese o le alofa o le Atua i le lalolagi, ua fa’aalia lea ia Iesu Keriso lona Alo na Afio mai.
- ii. Ona o lea alofa ua fai ma ala e fa’amafanafanaina ai loto o tagata, a o fesaga’i ma mea faigata o lenei olaga.

Tatalo o le Fa’ato’esega:

- i. Ona ua lē au lagona e nisi tagata le alofa o le Atua i o latou olaga.
- ii. Ona ua le mafai ona tatou tali atu i le alofa o le Atua i o tatou olaga atoa, a ua na o sina vaega itiiti.

Tatalo o Mana’oga:

- i. Ina ia avea le alofa o le Atua ma o tatou malamalama i aso uma.
- ii. Ina ia moni lo tatou alofa i le Atua e ala i o tatou ola auauna atu mo Ia.

**Iulai 12, 2025**

Tusi Faitau- 2 Samuelu 5:1-5; 9-10

Matua f.9-10: *Ona nofo ai lea o Tavita ile olo, ua ia fa’aigoa ai, O le aai a Tavita. Ua ati fa’atamilo e Tavita, e afua mai i Milo a e o’o i totonu. Ua tupu pea lava le mamalu o Tavita, sa ia te ia foi le Alii le Atua o au.*



## MANATU AUTŪ: MAUAINA O IERUSALEMA

### Tatalo Fa'afetai-

- i. Fa'afetai i le Atua ona o Ana tofiga ua valaauiina ai i tatou i totonu o Nuu, Malo ma Ekalesia.
- ii. Fa'afetai aua na te saunia pea ma fa'aupegaina lana fanau fa'atuatua e faia Lona Finagalo i soo se ala.

### Tatalo o le Fa'atoesega-

- i. Ona ua tatou le fa'amaoni e fa'atino o tatou tiute e pei ona valaauiina ai i tatou e fai ma Ta'ita'i o Aiga, Nuu ma Ekalesia.
- ii. Ona ua avea lo tatou valaauiina e fai ma ala ua saili ai o tatou lava viiga, ae le o le viiga o le Atua o lē e ona le valaauiina.

### Tatalo o Mana'oga-

- i. Tatalo i le Atua ia aumaia le poto male malosi e fa'atino ai o tatou tiute e pei ona valaauiina ai i tatou i totonu o Aiga, Nuu, Malo ma le Ekalesia.
- ii. Tatalo i le Atua ia tatou maua pea le fa'amaoni ma le lototele e tautala ai ma le alofa ma faia ai fa'aiuga e tusa ma Lona finagalo.

## **Iulai 19, 2025**

Tusi Faitau- Salamo 48:1-8

Matua- f.2 *E matagofie le maualuga o le mauga o Siona, e fiafia ai le lalolagi uma, o i le itu i matu, le aai a le Tupu silisili.*

## MANATU AUTŪ: FA'AILOGA O SIONA

### Tatalo Fa'afetai-

- i. Ona o le fa'ailoga o Siona o le Mauga e Afio ai le Atua.
- ii. Ona o fa'ailoga o Siona e aumai ai se fafagu mo i tatou i aso nei, ina ia tatou manatua e ao ona viia le Atua lo tatou Tama i soo se taimi.

### Tatalo o le Fa'atoesega-

- i. Ona ua tatou le iloa ona vivii ma fa'afetaia le Atua i taimi uma.
- ii. Ua tatou fa'atuatua'ni le uiga moni o fa'ailoga o Siona.

### Tatalo o Mana'oga-

- i. Ia aumai le loto matala e iloa ai uiga loloto o fa'ailoga o Siona.
- ii. Ia foai mai le poto e leoleoina ai o tatou loto mai fili o le lalolagi.

## **Iulai 26, 2025**

Tusi Faitau - 2 Korinito 12:2-10

Matua f.9 - *Ona fa'apea mai ai lea o Ia ia te a'u, O Lo'u nei Alofa tunoa e lava lea e fesoasoani ia te oe, aua o le vaivai e fa'aatoaina ai Lo'u Mana. O lea ua tele ai lava Lo'u fiafia i le mitamita i mea ua ou vaivai ai, ina ia tumau i o'u luga le Mana o Keriso.*

## MANA AUTŪ: MALOSI O LE MANA MA VAIVAIGA FA'ALE-TAGATA

### Tatalo Fa'afetai -

- i. Fa'afetai ona o le Atua e mafuta mai, ua mafua ai ona tatou maua le loto tele e fa'aauauina ai lo tatou valaauina.
- ii. Fa'afetai ona o le Agaga Paia o lo o fai ma o tatou fesoasoani e tauto'a-luaina lo tatou vaivai i taimi e lu'itauina ai le fa'atuatua.

Tatalo o le Fa'atoesega -

- i. Fa'atoese i le Atua ona o lo tatou mitamita i lo tatou malosi, a ua galo ai Lona mana e laveaiina ai i tatou mai faigata o le ola.
- ii. Fa'atoese i le Atua ona o lo tatou fa'atamala e mafuta i le Atua i taimi uma, ua mafua ai ona tatou fefefe ma to'ilalo i mea e tutupu i le ola.

Tatalo o Mana'oga -

- i. Tatou ole atu i le Atua ina ia aumai le lototele e tete'e atu ai i fa'aosoosoga a le alii o lenei lalolagi.
- ii. Tatalo i le Atua ina ia fesoasoani mai Lona mana i lo tatou vaivai ona o tauinanauga o le loto, ma fa'amanatu mai pea ia i tatou ia 'aua lava ne'i o tatou mitamita i se mea e tasi, ae tau lava o le Satauro o Keriso.

**Aukuso 02, 2025**

Tusi Faitau - Mataio 11:27-30

Matua f.28 - *Ia outou omai ia te a'u, outou uma o e tigaina ma mafatia i avega, o a'u fo'i e malolo ai outou.*

MANATU AUTŪ: TAGATA PUAPUAGATIA

Tatalo Fa'afetai -

- i. E ui ina tele ituaiga puapuaga o lo'o feagai ma le olaga, a ua saunia foi e le Atua auala mo lo tatou laveaiina.
- ii. Ona o le galuega lilo a le Agaga mo e ua fa'anoanoa ma mafatia.

Tatalo o le Fa'atoesega -

- i. Ona o le tele o puapuaga ua tatou mafatia ai, e mafua o tatou lava.
- ii. Ona o le lē salamo o loto o tagata i puapuaga ua oo i o latou olaga.

Tatalo o Mana'oga -

- i. Ina ia avega puapuaga ma fafagu i olaga o tagata.
- ii. Ia avega puapuaga ma ala e lagona ai le salamo moni.

**Aukuso 09, 2025**

Tusi Faitau- Ioane 16:29-33

Matua f.33- *Ua ou fai atu nei mea ia te outou ina ia outou maua le manuia ia te a'u. E maua foi outou e le puapuaga ile lalolagi, a ia outou loto tetele ua ou manumalo i le lalolagi.*

MANATU AUTŪ: O LE ATUA MANUMALO

Tatalo Fa'afetai-

- i. Ua fa'aalia Lona manumalo ia Keriso Toe Tu i le oti ma le tuugamau.
- ii. Ona o se lu'itele mo le olaga o le tagata, ia manumalo i mea leaga ma le agasala.

Tatalo o le Fa'atoesega-

- i. Ona ua tatou lē mataala ma tatalo e manumalo ai.
- ii. Ona ua lē lava lo tatou malosi fa'ale-agaga ina ua tatou fa'atu'utu'u i lo tatou vaivai ma galo le Atua o le puni o fa'amanuiaga uma.

Tatalo o Mana'oga-

- i. Ia tatou maua le malosi fa'ale-agaga e fa'atupu ai lo tatou ola fa'atuatua e manumalo ai i le tiapolo ma ana fa'aosoosoga.
- ii. Ia malosi o tatou agaga e fesaga'i ai ma fa'afitauli o le olaga.

**Aukuso 16, 2025**

Tusi Faitau- Sapakuka 1:1-4, 3:16-19

Matua Sapakuka 2:4- ...a o le ua amiotonu e ola ia i lona fa'atuatua.

MANATU AUTŪ: SOIFUA I LE FA'ATUATUA I ASO FAIGATA

Tatalo Fa'afetai-

- i. Ona o fa'aliga o Lona alofa ua tatou mautinoa ai e le tuulafoaiina i tatou e le Atua.
- ii. Ona e ui lava i lo tatou mamao ma o ese pea ma Ia, ae o loo alofa mai pea o Ia iai tatou.

Tatalo o le Fa'atoesega-

- i. Ona o lo tatou o ese soo i ona luma i lea aso ma lea aso.
- ii. Ona ua leai so tatou fa'atuatua i le Atua e mafai ona tatou manumalo ai mai faigata o le ola.

Tatalo o Mana'oga-

- i. Ina ia foai mai le fa'atuatua e mafai ai ona soifua i faigata o aso uma.
- ii. Ina ia maua le mafutaga ma le Agaga e fa'alototeleina ai pea i tatou e fetaia'i ma mea o loo tutupu i le ola.

**Aukuso 23, 2024**

Tusi Faitau- Efeso 4: 4-6

Matua f.4- *E fa'apei ona valaauina outou i le fa'amoemoe e tasi*

MANATU AUTŪ: E TASI I TATOU UMA I MEA FAI I LE GAUEGA

Tatalo Fa'afetai-

- i. Ona o le Tala Lelei ua lava ma totoe mo mea ua aupito sili ona matou mana'omia, atoa ma mea aupito mana'omia e tagata.
- ii. Ina ua valaauina lana Ekalesia na te fa'asalalauina lenei Tala Lelei i tagata uma ma le foafoaga atoa.

Tatalo o le Fa'atoesega-

- i. Ona ua tatou fa'afilemu i le talaiga o le Tala Lelei i aso uma i totonu o aiga, o nuu, ma le Ekalesia.
- ii. Ona o le ola fefulituaa'i ma le le galulue fa'atasi, ua le atoatoa ai le fa'atinoina o le ola valaauina mai le Atua.

### Tatalo o Mana'oga-

- i. Ia fa'atupu atili le agaga ma le ola fesootei, ina ia tatou feso'ota'i fa'atasi ai ma ona tagata i so'o se mea, e fa'ataunuuina ai Lana poloaiga.
- ii. Ina ia o tatou usiusita'i ia te Ia i lo tatou aufa'atasi ma isi, atoa ma lo tatou manatu mamafa ia i tatou.

### **Aukuso 30, 2025**

Tusi Faitau- Fa'amasino 7:1-7

Matua f.7- *Ona fetalai mai ai lea o le Alii ia Kitiona, O le tolu selau o tagata e na etoeto i le vai, ou te fa'aola ai ia te outou, ma tuuina atu Mitiana i lou lima, a o le nuu uma ua totoe, ia ta'itasi ma alu i lona nuu.*

MANATU AUTŪ: O LE TUPULAGA FILIFILIA OUTOU

### Tatalo Fa'afetai-

- i. Mo i latou sa filifilia e fai ma ana ave feau, ia latou fesoasoani atu i isi tagata mo Lona finagalo ia latou talia.
- ii. Mo Lana aufilifilia i atunuu ma Malo ma Ekalesia ma Aiga, o loo latou avatu ai le finagalo o le Atua i o latou tagata.

### Tatalo o le Fa'atoesega-

- i. Ona o le au filifilia ua le usiusita'i i le finagalo o le Atua, a ua fai o latou loto ma pauu atu i le agasala.
- ii. Ona ua le fa'amaoni i tatou ua filifilia ma valaauina e fa'ataunuu ma faia Lona finagalo i soo se mea tatou te i ai.

### Tatalo o Mana'oga-

- i. Mo i latou o e ua filifilia mo le galuega ta'ita'i i soo se atunuu. Ia latou maua le filemu mai le Atua.
- ii. Ia tumau pea le naunau e fai ma mea faigaluega a le Atua e momoli atu lona finagalo ia i latou.

### **Setema 06, 2025**

Tusi Faitau- Ioane 3:16-21

Matua f.16- *Aua ua fa'apea lava ona alofa mai o le Atua ile lalolagi, ua Ia aumai ai Lona Atalii e to'atasi, ina ia le fano se tasi e Fa'atuatua ia te Ia, a ia maua e ia le ola e fa'avavau.*

MANATU AUTŪ: O LE TALA LELEI O LE MEA ALOFA A LE ATUA.

### Tatalo Fa'afetai-

- i. Ona o le Tala Lelei o mea moni lava, ua fa'aalia mai ai le uiga o le Atua ma Lona alofa le ma talatalaina.
- ii. Aua e le mafai e se isi lava malosi ona aveeseina i tatou mai le alofa o le Atua o lo'o ia Keriso.

### Tatalo o le Fa'atoesega-

- i. Ua tatou le fa'amaoni i le talaiina o lana Tala Lelei.

- ii. Ina ua tatou ta'utino atu ua tatou gaua'i i o tatou tu'inanau ae le o le Tala Lelei tau i le Atua ma Lona alofa e ala ia Iesu Keriso.

Tatalo o Mana'oga-

- i. Ina ia fa'aailoa mai o le Atua e ala i le galuega mana a le Agaga Paia, lo tatou vaivai ma le pa'uu maualalo pe a fa'atusatusa i Lona alofa na ala mai i Lana Tala Lelei.
- ii. Mo auala esese mo le fa'aolaolaina pea o le Tala Lelei. Tatalo mo le Au Folafofa o le Tala Lelei, e pei o le Au Maturu o e ua latou aumai lenei Tala Lelei i Samoa ma le Pasefika.

**Setema 13, 2025**

Tusi Faitau- Luka 11:17-20

Matua f.19- *Fa'auta ou te foa'i atu ia te outou le pule e soli ai Gata ma Akarava male malosi uma o le fili, e leai lava se mea e leaga ai outou.*

MANATU AUTŪ: O LE TALA LELEI O LE MALOSI E MANUMALO AI.

Tatalo Fa'afetai-

- i. Ona ua tatou maua i le Keriso se Fa'aola e tumu i le malosi, na Ia fa'atoilaloina ai le Tiapolo i fa'asoosoga.
- ii. Aua na Ia manumalo i le Satauro, o le tasi lea fa'aailoga o Lona Alofa, le fa'aailoga foi o le malosi o le Tala Lelei e manumalo ai.

Tatalo o le Fa'atoesega-

- i. Ona o lo tatou vaivai i matauina togafiti a le fili.
- ii. Ona ua tatou augatata e tautala atu i le fa'aolataga mai ia Keriso.

Tatalo o Mana'oga-

- i. Tatalo mo e ua fai ma pagota o le agasala ma e ua pologa i le amioleaga.
- ii. Tatalo mo tupulaga ua manunu'a ona o le agasala a o latou matua.

**Setema 20, 2025**

Tusi Faitau- Salamo 18:20-24

Matua f.20- *Ua tauia mai a'u e le Alii e tusa ma la'u amiotonu; Ua tauia mai e la ia te a'u e tusa ma o'u lima mamā.*

MANATU AUTŪ: SAVALI I LUMA O LE ALII MALE LOTO ATOA

Tatalo Fa'afetai-

- i. I lona lima ta'ita'iina o lo tatou savaliga fa'ale-fa'atuatua i ona luma ma le filemu.
- ii. Ona o loo tatou savavali pea ma le mautinoa o loo fa'atasi mai le Atua ma i tatou.

Tatalo o le Fa'atoesega-

- i. Ona ua manatu maualalo le tagata i ona tiute ua valaauina ai e le Atua, ma ua le faia ai le amiotonu e pei ona finagalo iai le Matai.
- ii. Ona ua tatou le maua le loto fa'amagalo i e o ita mai ma agaleaga mai, ae ua tatou savavali male loto tiga male mataua.

### Tatalo o Mana'oga-

- i. Ia foa'i mai le loto mama ma le loto fa'amagalo e mafai ai ona tatou iloa le finagalo o le Atua.
- ii. Ia loloto lo tatou va'ai i le lumana'i, aua o mea e faia i le taimi nei, e savavali ai fanau, o Nuu, o Aiga ma Ekalesia i le lumana'i.

### **Setema 27, 2025**

Tusi Faitau- Salamo 46:8-11

Matua f.9- *Ua fa'ai'ua e ia o taua e o'o lava i tuluiga o le lalolagi, ua gagau e ia le aufana ma vavae le tao, ua susunuina foi e ia kariota i le afi.*

MANATU AUTŪ: O TAUA MA FEVAEVAEAIGA

### Tatalo Fa'afetai-

- i. Ona ua avefa taua ma fevaevaeaiga ma ala e fa'aumatia ai pulega a Malo fa'apaupau.
- ii. Ona o le galuega a le Agaga Paia i loto o Malo ma tagata, ua fa'aitiitia ai taua ma fevaevaeaiga.

### Tatalo o le Fa'atoesega-

- i. Ona o le loto fa'amauuluga o nisi Malo ua mafua ai ona tupu pea taua ma fevaevaeaiga i le lalolagi.
- ii. Ona o le tele o nisi feeseeseaiga o loo tutupu i le lalolagi, o loo mafua mai i ulu ma ta'ita'i o Malo ma Ekalesia.

### Tatalo o Mana'oga-

- i. Ina ia vave mai ia ni aso e filemu ai le lalolagi aemaise le Ekalesia.
- ii. Ia maua se avanoa i loto e mafaufau ai i le filemu mai le Atua.

### **Oketopa 04, 2025**

Tusi Faitau- Roma 8:35-37

Matua- ff.35-37: *O ai ea se na te fa'ate'aeseina mai i tatou mai le Alofa o Keriso? O le puapuaga ea, poo le le atuatuva'e, po'o le saua, po'o le oge, po'o le le lavalava, po'o le pagatia, po'o le pelu? Aua tatou manumalo a'ia'i i nei mea uma lava, ona o la ua alofa mai ia te'i tatou.*

MANATU AUTŪ: FA'AMOEMOE MO TAGATA PUAPUAGATIA

### Tatalo Fa'afetai-

- i. Le olaga o lo'o tatou o iai o lo'o tumu i puapuaga ae fa'amafana-fanaina pea tatou, aua o loo fa'atasi mai pea lo tatou Ali'i.
- ii. Mo falema'i ua fa'atuina ma Foma'i, o ali'i ma tamaita'i ma la latou galuega mo tagata puapuagatia so'o se itu o le lalolagi.

### Tatalo o le Fa'atoesega-

- i. Ona o le tele o mea ua tatou nonofo lava i tatou ma fa'atupu ai lo tatou puapuagatia, e pei o le inu ava oona, fualaau fa'asaina, ma isi.
- ii. Ona ua leai se fa'amoemoe ola mo le tagata puapuagatia, ina ua fa'atau-va'a le manatu i le alofa o Keriso na maliu ai i luga i le satauro mo i tatou.

### Tatalo o Mana'oga-

- i. Tatalo mo e ua mama'i ma gasegasea i ma'i tumau o le tino.
- ii. Tatalo mo e ua gasegase le mafaufau ma le agaga; ia fa'atumuina lo latou gaogao fa'aleagaga e mautinoa ai i le alofa o Keriso lo tatou Alii.

### **Oketopa 11, 2025**

Tusi Faitau- Fa'ataoto 3:1-12

Matua- f.11- *Lo'u Atalii e, aua le fa'atauva'a ia te oe le a'oaiga a le ALII.*

MANATU AUTŪ: O AFAFINE MA ATALII O LE ATUA

### Tatalo Fa'afetai-

- i. Ona o le Atua e a'oa'i mai ma fa'atonu mai i lana fanau e tusa ma ala e tatau ona ola ai.
- ii. Ona o avanoa ua tatou maua e fa'alogo ma ususita'i ai i lana Afioga.

### Tatalo o le Fa'atoesega-

- i. Ona ua tatou le a'oa'i ma fa'atonu fanau e tusa ma ala o le Atua, aua a oo ina matua e le toe te'a ese ai.
- ii. Ona ua tatou le manatu mamafa i Tulafono ma Poloaiga a le Atua.

### Tatalo o Mana'oga-

- i. Ina ia teufatu i loto ma agaga o lana fanau fa'atuatua le taua o ana poloaiga ua tuuina mai mo i tatou,
- ii. Ina ia maua le fa'amaoni ma le loto alofa i loto ma agaga o lana fanau e fa'atino ai tiute ma faiva e pei ona Ia valaauina ai i tatou.

### **Oketopa 18, 2025**

Tusi Faitau- Iakopo 3:1-12

Matua- f.5- *E fa'apea foi le laulaufaiva, o le mea itiiti lea, a ua lafo upu fa'asausili. Fa'auta, o le afi itiiti e mu ai vao laau e tele!*

MANATU AUTŪ: O UIGA ESEESE O LE LAULAUFAIVA

### Tatalo Fa'afetai-

- i. Ona o loo manino ma fa'ailoa mai e le Aposetolo uiga eseese o le laulaufaiva e malepelepe ma motusia ai Mafutaga.
- ii. Ona o le lapataiga ua fa'ailoa mai mo le 'Au Kerisiano uma, e ao lava ona fa'aeteete i le tautala aua o le upu e pa'u atu i le gutu e le mafai ona toe fa'afoti mai.

### Tatalo o le Fa'atoesega-

- i. Ona ua fa'aaoga le laulaufaiva e faifai ai i tagata ua faia ia foliga i le Atua, ae ua le iloa ona fa'amanuia atu iai.
- ii. Ona o le malosi o le laulaufaiva ua fai ma ala ua talepe ai mafutaga i Aiga, Nuu, e oo lava i totonu o Ekalesia.

### Tatalo o Mana'oga-

- i. Ina ia maua le fa'autauta ma le mataala e lafo ai upu e manuia ma ola ai le isi tagata.

- ii. Ina ia fa'aeteete i le laulaufaiva, e mafaia ona fa'aleleia ma fa'ata-apeape ai Aiga, Nuu ma Ekalesia.

### **Oketopa 25, 2025**

Tusi Faitau- Ieremia 4:1-4

Matua- f.1- *Isaraelu e, afai e te fia foi mai, ina foi mai ia ia te A'u, o loo fetalai mai ai le ALII, afai foi e te tuueseaa au mea e inosia i o'u luma, ona e le taase lava lea.*

MANATU AUTŪ: TOE SASA'A LE FAFAO

#### **Tatalo Fa'afetai-**

- i. Ona ua fai pea le Tusi Paia ma o tatou fa'asino ala, ina ia tatou iloa ai ona salamo ma toe fo'i atu i le Ali'i.
- ii. Ona o le fa'amanatu taua o loo alagaina pea e le leo fa'a-perofeta o le Tala Lelei i Aso Sa ta'itasi.

#### **Tatalo o le Fa'atoesega-**

- i. Ona o le punitia o manatu sautualasi o le Atua o loo fia sasa'a mai, talu ai lo tatou fiafia e ola i le agasala ma le amio leaga.
- ii. Ona o le le fautuaina o tatou tagata ua tele ai ina tatou le fa'alogi i le musumusuga a le Agaga Paia.

#### **Tatalo o Mana'oga-**

- i. Ina ia tatou iloa ona salamo ma fo'i i le Alii i le agaga ma le fa'amaoni.
- ii. Ina ia tatou maua uma le Tofa ma le agaga fetalai'i e fetuuna'i ai le fa'utaga ma le moe saili i itu uma o loo lape ai la tatou tautua i le Atua.

### **Novema 01, 2025**

Tusi Faitau- Ioane 21:9-12

Matua- f.11- *Ona alu ane lea o Simona Peteru, ma toso mai le upega i uta, ua tumu i i'a tetele, e lau selau, ma le lau lima, ma le tolugalau, e ui laa ina tele o i'a, a e le'i masae lava le upega.*

MANATU AUTŪ: SASA'A I LE ATUA LOU OLA

#### **Tatalo Fa'afetai-**

- i. Ona o le faiva fa'aola o le Alii ua sasaa fa'aoti mai i le lalolagi.
- ii. Ona o le alafua ua fa'ataoto mai e le Tautai tatou te mulimulita'i ai.

#### **Tatalo o le Fa'atoesega-**

- i. Ona o le fa'a'afa'afa ona sasaa o a tatou fa'atautaiga i le Alii.
- ii. Ona o lo tatou manumanu ma le mata'ū e fa'asoa ma foai mo le Atua.

#### **Tatalo o Mana'oga-**

- i. Ina ia a'oa'o mai pea e le Tautai sili i auala eseese o fa'amanuiaga fa'ale-agaga, e fa'atino ai lo tatou tautua ma le auunaga.
- ii. Ina ia ta'ita'iina pea e le Agaga o le Atua le Ekalesia ma o tatou tagata, i feau ma galuega o totoe o lenei tausaga.



## **Novema 08, 2025**

Tusi Faitau- Salamo 127:1-2

Matua- f.1- *Afai e le atina a'e e le ALII le fale, e galulue fua i latou o e atina a'e, afai e le leoleo e le ALII le a'ai, e mataala fua o le na te leo leoina.*

MANATU AUTŪ: ATIA'E FA'ATASI MA LE ATUA

### **Tatalo Fa'afetai-**

- i. Ona o loo tupu pea le Ekalesia ma le soifua auauna o o tatou tagata, i le fa'atasi mai o le Atua.
- ii. Ona o le foai mai pea mo i tatou uma taitoatasi o le malosi fa'afouina ma le atamai, e fa'ataunuu ai lo tatou tautua ma le auaunaga.

### **Tatalo o le Fa'atoesega-**

- i. Ona o le tatou lē fiafia e atiae fa'atasi ma le Alii, o Le e ona le malosi tatou te mafaia ai soo se mea.
- ii. Ona ua tele ina tatou fa'amoemoe ma fa'alagolago i lo tatou pototo ma le malosi fa'ale-tagata, e fa'atino ai a tatou feau ma galuega.

### **Tatalo o Mana'oga-**

- i. Ina ia tatou fiafia uma e atiae le Talalelei ma le mautinoa, e ui ina tatou vaivai ma lē atoatoa, ae o loo 'au le Atua ma i tatou.
- ii. Ina ia maua e le Ekalesia Aoao ma tagata uma le mana o le Agaga Paia, tatou te galueaina ai ma atiae lona malo.

## **Novema 15, 2025**

Tusi Faitau- Iona 3:1-10

Matua- f.5- *Ona talitonu ai lea o tagata o Nineva i le Atua...o alii atoa ma tagatanuu.*

MANATU AUTŪ: O LE ATUA AGALELEI

### **Tatalo Fa'afetai-**

- i. Ona o le Atua e onosa'i ma Agalelei i ona tagata.
- ii. Ona o le Atua e tuuavanoa ina ia salamo le tagata mai le agasala.

### **Tatalo o le Fa'atoesega-**

- i. Ona ua tatou le lagona le salamo moni i o tatou amioga fa'aalia.
- ii. Ona ua na ona tatou fa'apea ifo, le Alii e, le Alii e, ae ua le moni lo tatou ola auauna mo Ia.

### **Tatalo o Mana'oga-**

- i. Ina ia tumau mai pea i o tatou luga le filemu o le Atua ma Lona Mana e ta'ita'iina ai i tatou a'o tatou tulata atu i le tau fa'ai'ui'u o lenei Tausaga.
- ii. Ia alofagia le soifua o Tama ma Tina matutua o Aiga, Nu'u ma Eka-lesia, o loo feagai ma gasegase ma ma'i o le tino fa'apea i latou uma o loo saili malo e ala i Lana fa'amalologa.

## **Novema 22, 2025**

Tusi Faitau- Luka 17:15-19

Matua- f.15- *O le tasi o i latou, ua na iloa ua fa'amaloloina o ia, ona toe foi mai lea o ia, ua vivii atu i le Atua ma le leo tele.*

MANATU AUTŪ: NE'I GALO SE FA'AFETAI

Tatalo Fa'afetai-

- i. Ona ua mavae atu se vaega tele o feau ma galuega o lenei tausaga, a'o fa'atumauiina pea le malosi ma le fiafia e auauna ma tautua le Atua, e ala i lana Ekalesia.
- ii. Ona o le Agalelei ma le alofa fa'aalia o tagata iai tatou, o loo atagia ai le Atua ma Lona Finagalo Alofa mo i tatou o lana fanau.

Tatalo o le Fa'atoesega-

- i. Ona ua tatou sapi i tamaoaiga mai le Atua ae ua tatou maua ula futifuti.
- ii. Ona ua galo ia te i tatou ona fa'afoi le viiga ma le fa'afetai i le Atua, ina ua tatou fa'amuumua o tatou tagata ae fa'amulimuli le Alii.

Tatalo o Mana'oga-

- i. Ia fa'atumulua i tatou uma i le agaga fia vivii i le Atua i aso uma.
- ii. Ina ia tatou lagonaina uma le agaga fa'afetai i le Atua, ona o galuega ma mea lelei ua faia e isi tagata mo i tatou.

**Novema 29, 2025**

Tusi Faitau: Mataio 6:25-34

Matua- f.33- *A ia outou mud'i saili Lona Malo ma Lana amiotonu, ona fa'a-opoopoina atu lea o ia mea uma ia te outou.*

MANATU AUTŪ: SAILI LE ATUA MALE LOTO FA'AMAONI

Tatalo Fa'afetai:

- i. Ona o le tautua matavela a o tatou aulotu taitasi mo le galuega a le Atua, ua manuia ai galuega a le ekalesia, i le folauga umi o lenei tausaga.
- ii. Ona o le fa'amaoni o le alofa o le Atua, na Ia le tuulafoa'iina ai le Ekalesia ma o tatou tagata, i le tele o taimi sa tatou fa'afesagai ai ma faigata.

Tatalo o le Fa'atoesega:

- i. Ona o le manatu fa'apito i o tatou loto, ua le mafai ai ona tatou fa'asoa ma tufa atu manuia o le Atua i isi o tatou uso a tagata.
- ii. Ona o le fa'apito o le tatou vaai ia te i tatou lava, e tele ai ina tatou tuuaia le leaga i isi tagata, ma le maua ai so tatou filemu ma le fealofani.

Tatalo o Mana'oga:

- i. Ina ia tumau mai pea le alofa o le Atua mo i tatou, ma fesoasoani mai pea i lo tatou vaivai.
- ii. Ina ia fusia i tatou uma i le loto fa'amaoni, tatou te tutu ma galulue fa'atasi ai ona le taufesiligia lea o le fa'amanuia mai o le Atua.

**Tesema 06, 2025**

Tusi Faitau- Salamo 103:1-5; Isaia 40:31

Matua- f.5- *O lē fa'afouina lou taule'ale'a fa'apei o le Aeto.*

## MANATU AUTŪ: O'O MAI LE FA'AMOEMOE

### Tatalo Fa'afetai-

- i. Ona o le fa'amoemoe ua saunia e le Atua ua avea ma ala mautinoa e Fa'aolaina ai i tatou pe afai tatou te Fa'atuatua ia te Ia.
- ii. Ona o le mautinoa ua aumaia e le Atua mo e fa'atalitali i lea fa'amoemoe male onosa'i.

### Tatalo o le Fa'atoesega-

- i. Ina ua tatou le talitonu i le fa'amoemoe ua saunia e le Atua, ae ua tatou talitonu i mea o lenei lalolagi.
- ii. Ina ua le moni lo tatou loto fa'afetai i le Atua o Ia lava o lo tatou pulu-vaga ma lo tatou Lafitaga.

### Tatalo o Mana'oga-

- i. Foa'i mai se loto mau e iloa ai fa'a'aliga o lona Alofa Tunoa mo i tatou, e ala i le fa'amoemoe ua Ia saunia.
- ii. Ina ua tatou iai ile amataga o le masina mulimuli o lenei tausaga, e fa'a-iloa mai ai le fa'amoemoe ua mae'a ona tapena e le Atua e ala i Lona Alo pele e to'atasi o Iesu Keriso lea.

## **Tesema 13, 2025**

Tusi Faitau: Kalatia 2:20-21

Matua- f.20- *Ua fa'asatauroina fa'atasi i maua ma Keriso, ou te le toe ola a'u, a o Keriso o loo ola i totonu ia te a'u, o le ola foi ou te ola ai nei ile tino, ou te ola ai lava i le fa'atuatua i le alo o le Atua, o le na foaiina mai o Ia e Ia mo a'u.*  
MANATU AUTŪ: IA TUMAU IA IESU KERISO

### Tatalo Fa'afetai:

- i. Ona o le avanoa ua maua e fa'aaogaina ai le ekalesia ma o tatou tagata, mo Iesu Keriso ma le talalelei o le fa'aolataga.
- ii. Ona o le fa'aoloaina o o tatou mafaufau vaivai i le poto mai le Alii, e fa'a-tonotonu ai mea uma tatou te faia, mo le manuia o fanau, o aiga nuu ma ekalesia.

### Tatalo o le Fa'atoesega:

- i. Ona o le papa'u o lo tatou ola fa'atuatua, ua tatou leiloa ai tauave o tatou tiute ma matafaioi, o le fa'aailoa atu lea o le Atua ma lona alofa i isi.
- ii. Ona ua avea lo tatou fa'apalapala fiugofie ma le fa'avaivai, ma mea ua fa'apalapala ai foi ma fa'avaivai isi o tatou uso a tagata.

### Tatalo o Mana'oga:

- i. Ina ia soifua Keriso i o tatou loto, ma fa'atumulia i tatou uma i le agaga fia vivii ia te Ia i aso uma, ona tatou le sese ese lea ma le moa o le ala.
- ii. Ina ia aoao mai pea e le Atua mo i tatou uma, auala eseese o ana fa'amanuiaga fa'aleagaga, e fa'atino ai le tatou tautua ma le auunaga, ona avea ai lea o i tatou e fa'afouina ai le ola o isi tagata.

## **Tesema 20, 2025**

Tusi Faitau: Eperu 1: 1 - 4

Matua- ff.1-2: *O le Atua na fetalai mai anamua i o tatou Tama e ala mai i perofeta, na auaua'i mai i faiga eseese, a ua Fetalai mai ia te i tatou i nei ona aso e gata ai e ala mai i le Alo, o le ua tofia e Ia e fai mea uma lava mona Tofi, na Ia faia foi mea uma e ala ia te Ia.*

MANATU AUTŪ: O LE TALA LELEI E NOFO AE OLO.

### **Tatalo Fa'afetai-**

- i. Ona o le finagalo alofa o le Atua ua ia saili mai ai pea mo i tatou.
- ii. Ona o Iesu ua ofoina mai lona soifua e togiola ai o tatou tagata agasala.

### **Tatalo o le Fa'atoesega-**

- i. Ona ua tatou musua e tala'i atu le talalelei, ona ua tatou ave le fa'amua-mua i a tatou tu ma aga masani fa'ale-tagata.
- ii. Ona ua avea a tatou amioga le taupulea, e fai ma mea ua solomuli ai ni isi tagata ma le Talalelei.

### **Tatalo o Mana'oga-**

- i. Ina ia 'aua nei muta le molimauina pea o le Talalelei e le Agaga o le Atua, i o tatou loto ma agaga.
- ii. Ina ia manatua pea e tagata Samoa uma, o le Alii o le Talalelei, o le fa'avae lea o le atunuu.

## **Tesema 27, 2025**

Tusi Faitau- 24:42-46

Matua- f.42- *O lea ia outou mataala ai, auā tou te le iloa po o le fea aso e sau ai lo outou Alii.*

MANATU AUTŪ: NOFO SAUNI MO LE ASO O LE ALII

### **Tatalo Fa'afetai-**

- i. Ona o a'oaoga ua tuu mai e Iesu, e fafagu ai le ola o ona tagata.
- ii. Ia avea lenei Afioga a Iesu, ma ala e nofo sauni ai le Kerisiano.

### **Tatalo o le Fa'atoesega-**

- i. Ona o lo o iloa pea lo tatou olaga lē nofo sauni.
- ii. Ona o lo o tatou fa'amatala pea i lo tatou ola fa'aleagaga.

### **Tatalo o Mana'oga-**

- i. Ia tatou nofo sauni mo le Aso o le Alii.
- ii. Aua le fefe, ae sauni ma le loto fiafia ma le loto fa'afetai i Lona toe afio mai.

## TA'UTINOGA MAFUTAGA 'AU LEOLEO

Ou te ta'utino atu, o le Mafutaga a le 'Au Leoleo, o le mafutaga tatalo a le Ekalesia, e galueaina ai le ola fa'aleagaga o le 'au fa'atuatua i le Atua.

Ou te ta'utino atu foi, o le Atua o le Agaga lava ia, e su'esu'e i o tatou agaga ma fuatia o tatou ola.

O le mea lea ou te ta'utino atu ai, o le a ou su'esu'e ifo i lo'u ola, ma o'u to'aga i mafutaga tatalo ma tapuaiga, atoa ma mea uma e fai a le Ekalesia, ina ia ou le tama ninii pea i le fa'atuatua, a ia oo i le fua o le ua matua i le Agaga.

Ou te ta'utino atu o le a fai ma a'u tatalo e tauave pea, 'Le Alii e, ia e alofa mai ia te a'u le tagata agasala ua fa'amagaloina. Ia e foa'i mai le lototele e suia ai mea ua tatau ona sui, ma le to'afilemu e talia ai mea e le tatau ona suia, ma foa'i mai le atamai e iloa ai le eseesega o ia mea'. Ia o'o mai lou Malo, ma ia faia Lou finagalo i le lalolagi e pei ona faia le lagi, Amene



**Tautua Printing Press**  
1 Kanana Fou St, P.O. Box 1537  
Kanana Fou, American Samoa 96799  
(684) 699-9810  
<https://efkasonline.org>